

Թաղիս մէջ բնիկ հազիւ քսանըփինգ կամ երեսուն տուն կայ Հայո: Պանդուխտ եղբայրներն, որք ստորերկրեայ տեղեր կբնակին հոս՝ ամեն կիրակի օրերը թաղին եկեղեցին կ'երթան եւ գանձանակներուն ստակ կը ձգեն: Եթէ թաղեցիներուն մնար՝ շատուց ծախուած էր եկեղեցին, որ այսօր շատ եկամուտներ ունի:

Այս եկեղեցւոյն թաղական խորհրդարանին մէջն էր ժամանակաւ *Ղալաթիոյ օճախը*: Այս եկեղեցւոյն մէջ կ'ըլլան ազգային Երեսփոխանական Ժողովոյ նիստերն, որք ամեն արժանիք ունին Ղալաթիոյ աշտարակին մէջ տեղի ունենալու:

Հոս բարձրացած է Կենդրոնական վարժարանն, որ դեռ բացուած չէ:

Ղալաթիացին տասներկու տարիներէ ի վեր կփափաքէր վար առնելու իւր թաղականն, որ ազգային շահերուն ջերմ պաշտպան ըլլալով՝ չէր թողուր, որ քիչ մ'ատեն ալ ուրիշները թաղականութիւն ընեն եւ խնդան. իսկ այս տարին թաղեցին յաջողեցաւ հրաժարեցնել իր թաղականն, որ լալով հեռացաւ խորհրդարանէն: Ընտրուեցաւ ուրիշ թաղական խորհուրդ մը, որուն անդամներուն մէջ անշահասէր մարդիկ կգտնուին, սակայն ասոնք ալ դասատուներու փոփոխութիւնը շատ կը սիրեն եւ գրեթէ շաբաթ չանցնիր, որ առանց պատճառի դասատու չփոխեն:

Հոս է կենդրոնական թանգարանն, որ ըստ ծանուցման՝ շաբաթն երեք օր բաց է եւ ըստ իրողութեան՝ շաբաթը ժամ մը միայն բաց է՝ *սիկառա* խմել ուզողներուն:

Այս թաղն է *Միացեալ ընկերութեանց* գրասենեակն, որ երկու ամսուան մէջ երկու գործադիր ժողով տեսնելու պատիւն ունեցաւ: Աստուած երրորդէն պահէ:

Վերջապէս այս թաղն կենդրոնական ըլլալով՝ շատ դիրութիւններ կու տայ մեզի՝ հոն երթալու եւ շաբաթը քանի մը անգամ ազգային խնդիրներու վրայ կռիւներ յարուցանելու:

ԻԳ.

ՂՈՒՐՈՒՉԷՇՄԷ

Այս գիւղին *Գուրուչէշմէ* կոչուելուն պատճառն են գեղին աղբիւրներն, որ բնաւ չեն վազեր:

Գեղացին աղբիւրը կշինէ, բայց անոր ջուր բերելու հոգ չըներ: